


淮海英靈集

四





集靈英海淮

(四)

輯元阮

淮海英靈集

程名世

字令延。號筠榭。江都人。與方扶南。杭莖浦。厲樊榭。沙白岸。章樂軒。杜補堂。江橙里。諸公爲詩友。賓客文酒之譙。埒於馬氏。乾隆壬午南巡。賜四品頂帶。所著有思純堂集。秋水芙蓉館集。小西館集。海上

集。撈蝦集。柘溪漁長集。老屋吟。飲淥吟。若干卷。詩餘一卷。樂府一卷。又有左傳識小錄。國策取譬。莊子貴言。老管荀韓四子。楞嚴。法華。維摩詰。三經註本。藏于家。子贊和。贊皇。贊寧。贊普。

過曾襄愍公墓

勝代論鄉哲。惟公善用兵。功揮大丞相。名重十先生。東市刑何慘。西陲計未成。可憐檀道濟。空自作長城。

爲杜補堂太守題野寺尋碑圖

明殉難總兵卜從善墓碑。在衛輝府。

崇禎之末蒼鳶愁。流寇劫掠殘中州。衛扼河朔賴誰守。將軍智勇非常儔。中州自決汴隄水。嵩瀍蕩汨無堅壘。抽戈奮起獨登埤。誓報主恩惟一死。此時賊兵如蟻屯。愁天黑壓營頭雲。已屠懷州使入衛。萬骸撐拄高成墳。仰天大呼臣力竭。炯然蹈刃完臣節。從容溫序肯汚須。慷慨葦宏深瘞血。河間太守杜陵叟。白髮詩名滿宇宙。卻因迎養履殷墟。弔古停驂幾搔首。聞說城陰片碣存。扶筇挈伴尋荒墳。空餘螭首埋荆棘。唯有啼雅繞墓門。歸來作詩寫吳練。更畫韓陵石一片。尺幅能招百戰魂。一篇可補孤臣傳。君不見逆奄禍國罪塞天。巍巍先世留遺阡。公昔典郡瀛海日。曳碑發塚夷爲田。又不見降闖老姦魏藻德。俎豆潞河猶竊食。公白行臺頓徹之。只用單詞當誅殛。嗚呼。循吏若此古亦稀。表忠鋤佞彰幽微。磊磊落落數大

事勝于史筆爭是非。

題兒子贊和騎牛圖

杏花已白蒲葉長。澌澌清流隴畔響。飯牛晨起事農功。南畝東菑任騎往。我生習懶懷晏安。不分五穀人譏訕。圖爾牛背亦有意。要知稼穡之艱難。古來叩髻多樵牧。挂角何妨勤補讀。不願爾作多牛翁。但為識字耕夫亦已足。

次韻江鶴亭焦山夜坐詩

名山屬良夜。詩思如潮湧。吟嘯振幽巖。氣壓山魍恐。宵深落霜華。欲出輒旋踵。小坐愛疎寮。靜對諸峯聳。分題同朋曹。擊鉢借釋種。詎畏蓮漏催。聊借禪衲擁。風多易生寒。樹古久合拱。劇韻勉為步。敢曰賈餘勇。望家書不至。

漏永怨長夜。羈懷總不禁。一家三處住。萬事五更心。歸夢尋偏遠。音書滯至今。嘹嘹南去雁。為爾幾沈吟。

貸圃八咏 竝序。

貸圃者。柘溪喬氏真意堂。去寶應五十里許。戊子冬。假館于茲。故得詳所歷。粵圃在宅後。環圃以牆。牆東啓小扉。有亭植叢桂。予顏之曰泰阿。由亭而東為堂。面深池。倚修竹。曰客

居所居堂。即真意堂也。堂左有廊。界以小牆。畫一為二。居中聽外。足音窅然。因似登音名之。循廊達黃楊館。頗幽邃。蓋堂居中。右顧有廊。左顧有亭。屋不必多。結構特妙。堂後池曰釣魚。閒處。竹旁屋。曰何可一日無

此軒。徑數轉。登層樓。則雞犬桑麻。歷歷寫下。七八月間。黃雲滿目。爰取詩人我稼既同之語。名曰稼同樓。樓下疊石為巖。松柏合拱。超然有遠致。所謂松石間意。不當如是耶。

真意名最佳。悠然有餘思。我借少陵詩。聊記客中事。

容居所居堂。原名真意堂。

素蕊飄天香。無聲和冷露。分得泰山阿。豈僅淮南樹。阿泰
 涉世有窮通。讀書悟悔吝。對樹一開顏。今年不逢閏。黃楊
 幾曲小廊幽。寥寥少來往。日暮盼詩人。如聞足音響。造音
 冷翠愛幽篁。暑氣了不受。何可一日無。散髮臥北牖。何可一日
 謾謾幾株松。磊磊數疊石。解帶此盤桓。形神兩俱釋。松石
 頻年大有書。秋來腹可鼓。閒日上樓時。看見農人苦。稼同
 一泓見澄渟。始識靜者妙。徒有羨魚情。萬事付之釣。釣魚

程兆熊字孟飛。一字香南。儀徵人。書法虞永興。亦精大小篆八分書。間作寫生畫。每多逸品。

舟行偶作

村路日將夕。牛羊仍未歸。炊烟浮瓦濕。野鳥掠船飛。雨歇蟬吟樹。風多客換衣。三年不到此。景物尙依稀。

秋懷

秋意偶然覺。搘頤歎索居。難憑歸去夢。頻看寄來書。月冷搗衣石。風驚拍浪魚。生涯一杯酒。身世兩何如。

吳文奎號山謁老人。歙溪大族。移籍儀徵。詩境清奧古豔。皆唐人正軌。錢塘厲太鴻。稱其善造語。始驚其言。若臨絕壑斷壑。悵惘欲返。繼乃索得微徑。往往見幽葩奇卉。其刻削如孟郊。其誕幻如李賀。高吟冥搜。無不

如志。所著寒綠齋詩集四卷。

梨雲曲

蘆芽白。江南燕。河豚翻乳西施饌。東風吹露上梨花。閒綠搖谿柳一線。烘雲日碎光玲瓏。晚霞飛豔山腰紅。石泉有味心開蓬。卻話香春愁病翁。

自題寒綠齋

窠石玲瓏幽草風。枝枝梅葉凋秋紅。齋旁冷豔聚雅玩。粉蕉綠卷紗幃中。香絲欲沈月一角。思織密雲膩如髮。半瓶蟹眼風颼颼。浮瓊嫩陰茶色活。詩撥芒角腸轉枯。燈搖禿影吟魂孤。埋頭十載不出戶。書味橫腹來相呼。

聽徐太真撫琴

柳疎人靜草蟲吟。十指秋泉瀉碧潄。一陣冷光搖綠綺。野香吹月上蘿襟。

舟返大颿山秋心辭

樓船颿影鋪橫波。白雲擘天山全遮。水蕩落穗菱浮花。風勢一側旋平沙。荒岡老鴉啄牛角。疎墨抹林圖一幅。簪簪罨柳魚腥簇。饑官也解歸田錄。菰蒲十里飛清霜。自釣秋江膾寒玉。

湖上送春

湖邊漫老此華日。三月都扶酒病身。一市柳絲低斂翠。亂花風捲欲收春。

石鏡臺卽事

一卷溫磨散繡絨。澹香亂裹小青衫。狸鬚繞雪白光滿。蟾背吹絲素影銜。酒釀新詩開石甕。花分清夢滿江帆。請君試看芙蓉鏡。忍咒空屏喝石岳。

遙和同人尋秋江上草亭

秋憐寒鏡落芙蓉。獨擁香幃賦瑟居。藤架夾花幽蘚滑。竹籬吹葉冷煙疎。半帆江影雁飛後。一抹山痕簾捲初。輸與閒卿豁清臆。半篝漁火十車書。

秋餞辭答高鳳岡

昏林幾樹葉凋紅。野篆初銷泊岸風。櫓曳鄉愁飄白港。竿挑山色挂烏篷。涼雲欲斷鐘敲影。素景都澄水印空。賸得籬花香滿路。拂衣倦倚小蠻童。

秋櫂遊

柳渚雲梢畫艫閒。看花人在翠圍閒。帆分月魄挂一葉。秋色滿林寒半灣。光紅疊巘日將落。暝草城頭鬩野雀。鏡平一櫂搖玻璃。影蕩樓臺綠霧薄。游魚空際漾鱗鱗。白鷺烟中飛漠漠。釣絲笠影滯生涯。半世曹騰覩縷作。波拳雲黑煮菰蒲。艸縛霜黃烹郭索。扁舟一任西風吹。且踞樽前倒芳酌。

訪菊西庵

肯放黃花一度虛。竹籬帘裏酒人居。霜鬢盈握香莖澹。詩鬢半邊秋影疎。菰擘米鮮咀味外。蓮吹葉老蕩香初。西冷舊館忽然僻。來聽殘經僧悟予。

邗上晤錢塘金壽門

白社逢伊歌吹裏。攜遶寒林喝進卮。墨風颯颯十指篆。霜影蕭蕭兩鬢詩。賸有枯田畊研格。儘多幽夢遶禪基。淒清寺北梅花月。吟斷鐘聲人不知。時寓竹西天寧寺僧舍。

齋中古梅逢秋忽開數蕊喜而詠之

九月棄菊只愛梅。一枝清孕羅浮胎。半放半含泣香雨。兩分花氣飄玉壘。主人髮疎花亦疎。向檐晴簇涼雲枯。虛簾月影瘦不隔。水浸瓊齋秋夢孤。

程以位

字品山。號豆田。江都人。少孤。後以哭母喪明。工書畫。最善白描人物。子壽康。壽齡。錄其遺詩爲豆田詩鈔一卷。

人日

歲序依然換。人情自覺新。六旬催白髮。五日駐青春。庭雨湔殘雪。村醪款舊賓。老來更頑鈍。慚愧值靈辰。
墨耕招集喜琴莊自黃山來。

蛆浮寒夜酒腸饒。人集幽齋少長咸。恰好大蘇催擊鉢。明逢小宋落歸帆。燈前笑語詢黃海。身上烟嵐染素衫。莫訝新詩驚四座。山川靈氣入瑤函。

黃

裕

字北垞。歙人。居揚州。乾隆十七年。北垞年五十八。移籍儀徵。用趙嘏句白首江上名集。

范張二孝女詩。

真州人。一年十三。一年十四。爲救父。一死于水。一死于火。

水火無情物。偏戕孝女身。可憐雙穉子。俱未及笄人。薄俗真堪挽。高風永不泯。曹娥江上淚。千古共含辛。

玉魚壓繡歌。爲汪表弟礲巖作。

失水老魚乾。殼棘泣過黃河化爲玉。偶然掉尾到人間。猶帶千年土花綠。深閨藉汝壓繡牀。刺成常伴雙鴛鴦。不須銜向佳人口。也覺紅窻竟日涼。嗚乎世事多桑海。魏宮無復針神在。可憐淪落逐殘絲。金鳧銀雁須臾改。一朝攫取歸吾徒。壓繡不得翻壓書。硯池一勺潢汙水。還似脂箱粉盞無。

冬日尋鏡薌亭舊址不得。卽用郝信使鏡薌亭詩韻。

孤亭不見臨揚子。却憶當時放雁人。薜荔荒煙行已暮。桃花寒食幾回春。池枯尙引殘潮入。樹老空摧落葉頻。惆悵城東尋舊跡。北風吹起馬蹄塵。

諸葛菜

南陽佳蔬餽芳鄰。銅鼓聲中又一春。怪得艸廬當日顧。英雄俱是灌園人。

己卯夏。館於江鶴亭苑。卿街南別業。昔爲余門人程志泰舊居。老友陳玉几亦嘗寓此。今老友歿已一載。而余門人卒且十四年矣。時方編舊雨集。及玉几詩。因感而賦。

友人歿後黃墟在。弟子亡來絳帳空。老我不堪今昔淚。一齊彈與碧梧桐。東偏小室。有梧桐二樹。余曾下榻于此。

秋日與張子煦齋野蠶上人過資福方丈。主僧貢植以香積款客。詩話竟日。復留坐知止軒中。出退谷中。允爲息翁老友所書心經小冊同觀。冊首有虛舟吏部玉筍小篆。欣賞不置。煦齋野蠶俱有詩。余于明晨之郡中。遂匆匆別去。歸日始補作詩。

久住張平子。新來湯惠休。同尋六朝寺。高話一林秋。野蕨分齋鉢。烟颿待客舟。瀕行觀小冊。又爲故人留。水香村墅。新闢藤花小逕。同盛引堂作。

水邊小逕喜新添。覓句行吟百不厭。翻笑青藤老居士。常扃書屋擁牙籤。

李兆吉 字雨村。甘泉人。乾隆戊午舉人。官湖南縣令。以善書名。

將之潤州東郭別友

河干分袂意遲遲。曾記同吟折柳詞。廿載壯懷消未盡。不堪又到落花時。

壽譽達 字升九。號菴坪。祖籍紹興。移隸江都。年九十餘。吟詠不絕。卒于乾隆癸丑。所著綠衫野屋詩鈔八卷。

過金壽門寓齋

繞膝書圍興不孤。十年聽雨老江湖。蕉衫椽笠陶宏景。賸水殘山劉伯芻。野艇釣依芳艸岸。夕陽吟指餅師爐。藤花落盡無人掃。門外松陰碧蘚鋪。

病起至東軒

拂面春風怯袷衣。籬邊青凍草芽微。梨花寂寂無人到。祇見空庭練雀飛。

王世球

字熙聞。號賀堂。甘泉優貢生。徵薦博學宏詞。白詩古文詞。及制藝南北曲。無不精善。所著有啄菴集。

遊香阜寺用東坡居士次守詮小詩韻

秋滿茱萸灣。風吹香阜寺。山門落葉多。颯颯隨行屨。僧窻見鴻影。自逐孤雲去。

指香居士席上送溫茂才鶴立歸吳興

高館張燈照離客。秋鴻夜叫西風急。西風江上芙蓉花。倩送歸舟好顏色。白露霏霏唱采蘋。涼秋應念江南春。那堪一盞南潯酒。勸爾南潯歸去人。

玉階怨

春月玉階暖。秋月玉階寒。多情謝明月。三十六年看。

橫塘行

妾家住橫塘。橫塘遶岸長。岸傍獨立思郎處。波冷萍開和影語。妾為塘畔孤根草。郎作風中轉蓬老。蓬逐回颺雲際飛。草枯只與根相依。羅襦日暮風吹亂。驚起鴛鴦聚還散。一棲陌上綠楊枝。一宿橫塘淺水陂。

王世錦

字濯江。號一齋。甘泉人。世球之弟。歲貢生。徵薦博學宏詞。詩古文詞。與兄並稱。學者宗之。謂之甘泉二王。晚年為課士堂院長。嘗手訂詩文集若干卷。有哭兄百韻詩。為世所重。

譯經禪院卽事。用壁間東坡憶仇池石硯詩韻。

蕭寺值新秋。滿階幽草綠。蓼花垂紅穗。眼前秋事足。堂上焦處士。鼾睡先坦腹。枯僧坐蒲團。苦吟額逾蹙。險韻疊東坡。詩中真頗牧。磊磊出奇峰。汪汪匯大瀆。詩成飲我酒。擷蔬切青玉。丈夫當雄飛。有時亦雌伏。或爲韓康藥。或爲君平卜。或放人天眼。光明燭幽谷。願言歸淨土。袞袞謝徵逐。偃鼠飲于河。滿腹足吾欲。酒酣同一笑。歸路迂且曲。矯首望青天。浮雲逝何速。

春仲同朱九次堂訪冒大菴原於僧舍留飲酒酣有作兼懷南徐李四琴夫。

風吹河漢流無聲。一廬佛火迎人清。如臯才子竭來此。春釀小酌珍珠傾。廿載勝事歡相數。記否登壇建旗鼓。爾時勅敵推兩朱。君自如龍朱如虎。予家兄弟操戈鋌。四方號召多豪賢。海門李四尤翩翩。風流文雅疑神仙。其氣不可遏。光芒躡牛斗。拂袖生萬象。脫口落璠玖。文瀾欲挽蘇韓潮。高筵共吸阮劉酒。十年變幻紛相仍。那堪死生聚散兼沈升。舊雨三人復此聚。萍花春水開層層。指點豪狂恣評議。若個能分造物餘。千秋許與名山事。何當便與李生俱。攜來春江花月同歌呼。悲歡袞袞逐吾徒。酒酣珍重黃公壚。

送溫犖飛鶴立歸吳興

西風吹信渡揚子。雁字迴文疾如駛。芙蓉作紅柳作黃。邗江秋夢隨流水。破書老劍裝縱橫。吳山越水爭逢迎。布帆無恙渺然去。獨立斜陽空復情。

渡江

碧水吐晴霞。遠山銜落日。江山抒文藻。烘染成一色。忽然驟風發。粘天起蘆荻。長空作雷聲。怪峯離浪立。輕帆怖中流。衝波隨所適。漸覺風已平。徐觀日初出。人生有險夷。變幻安可測。不從艱難來。誰知周道直。

李敬修

字惕原。號願齋。泰興歲貢生。著願齋詩藁四卷。

印節婦詩

節婦張氏。農家女也。歸印氏。印亦農家子。世居泰西鄉江岸。田數畝。張內事翁。外與夫力作。晏如也。逾年印以疾亡。張哀毀不欲生。以翁老病。又有遺腹。不忍捐。及期生子。喜曰。印氏有後矣。

雍正壬子七月江漲。漂沒者無算。張架木竹樹間。屬翁攜其子。而已在波濤震蕩中。保護什物。水退。田皆泥塗。嗷嗷乏食。以翁老子幼。不能存活為懼。自是益勤耕作。雖盛暑烈日。荷鋤田間。冬夜紡聲不絕。倦極坐而假寐。翁歿。衣衾諸事。皆勉力為之。子長。娶一媳。逾年得孫。而子又以疾亡。媳不類姑。不能留。張聽之去。復撫孫如子。艱難有加無已也。迨孫長。又與娶婦。而孫殊不肖。惰農業。張憤恨以終。年六十餘。乃作詩弔之。

吾鄉矜節烈。近迹隱江潯。危苦經三世。堅貞只一心。也知生趣少。偏覺舊情深。往事閒談及。令人淚滿襟。天道原無爽。榮枯運不同。秋風荒隻蝶。夜雨闌孤鴻。集蓼人情外。含悽土壙中。茫茫增百感。搔首問蒼穹。

羅人傑

號漢三。儀徵舉人。

題因樹樓詩

花下承顏處。天真樂事完。忽生風木恨。終斷綵衣歡。烏鳥情無盡。皁魚淚不乾。樓頭看日暮。冷落碧闌干。

湯應隆

字鍾律。號魯山。寶應增生。以詩名。與同邑劉光彭。喬立方。喬大鈞。湯襄隆。劉玉麟。喬大鴻。稱敦素園七子。所著有借樹軒集。

懷任幼植大椿

極目楚陽路。重重烟樹林。美人不可見。秋水一何深。菱渚雨初墮。蓮塘風半陰。倘乘剡溪興。放櫂徑相尋。

送王海山表叔主教潁州

汝南舊是漢名都。梅雨絲絲客戒途。聲價定知推馬鄭。風流應復繼歐蘇。七星雙柳供吟嘯。水色山光入畫圖。我亦挂帆向吳會。一時離思滿江湖。時有吳中之行。

秋日同崔華林唐果亭喬楓亭劉野塘鷺洲舍弟晴榭過飲仙菴聽鶴鋤羽士彈琴

華山道士浮邱公。花關晝靜幽蒙茸。垂簾終日抱綠綺。園客絲挂龍門桐。一行再鼓發清響。泠泠十指生清風。成連刺船去千載。海上雲霧空濛濛。水仙遺調至今在。朱絃疏越含無窮。班姬斂怨泣秋扇。箕子行邁傷離宮。四座無言盡傾耳。曲所未識神相通。此時雨過碧天淨。林鳥不鳴高山空。流泉涓涓激幽壑。驚濤謾謾吹長松。瑤階聲唳別離鶴。玉宇影度孤飛鴻。始知箏瑟悅人耳。淫哇拉雜殊非工。日暮曲罷下山去。餘音嫋嫋隨疏鐘。登臚迴望白雲合。大江星月迴魚龍。

徐開綸字弟言。號鈍人。甘泉人。居邵伯鎮。任江西崇義縣尉。著有味書草堂詩集。花香留飲集。七夫人傳。

怨詞

容華已憔悴。留得腰肢小。庭院易黃昏。春漏不肯曉。羞月避涼帷。吟風怯素篠。夢裏驚啼痕。醒時記多少。

夜坐懷劉四

涼風生虛室。夜氣肅羣慮。舉頭山月上。萬竹忽流素。勞心未能閒。耿耿誰與訴。願借西南風。吹夢海東去。海東隔層雲。夢裏難尋路。脈脈對芳樽。綠鬢已非故。

擬捉搦歌

園蒿不刈長成樹。倉粟不舂化爲土。女非男兒立門戶。爺娘不嗔兄弟怒。燒冶化銅鑄圓鏡。傾汞研鉛磨鏡淨。女兒照影惜雙鬢。年年說嫁娘無信。

晚舟

小雨時初霽。輕帆入暝烟。雲歸流水外。村隱落霞邊。野渡啼飢鳥。枯楊繫釣船。迷津何處問。身世兩茫然。

贈許丈鵞田

窮居求一友。如鳥得同聲。寡遇具真識。孤交無泛情。水雲天外意。松柏雪中盟。不似豪遊者。朝歡夕已更。

春暮

花落稠新葉。亭虛樹有陰。燕肥低翼去。蜂暖抱鬚吟。酒癖因貧減。春愁入病深。柳絲侵短髮。惆悵此時心。

寄黃春堂

一室孤吟自少歡。釣絲終日老湖干。村深茅屋住原僻。家遠故人思見難。春水客帆低野樹。晚烟沙鳥下

晴灘離情渺渺白雲際注日長流獨倚欄。

汪漢倬

字大章。號箕臺。歙人。寄籍江都。畏齋弟三子。庠生。乾隆十一年。官刑部雲南司主事。晉廣東司員外郎。職。奉十三年。每決獄。九卿皆推平允。尋補山東糧道。署藩臬。屢斷疑獄。治河堤。才敏識卓。大中丞長

白郭公。稱為上好官。又于德州創建繁露書院。以修文事。署中設射圃。命運丁習射箕臺。早年工制藝。與涇縣鄭洪林。桐城方南堂。江都郭秋浦齊名。詩多亡失。其姪對琴比部棟。綴拾為箕臺詩鈔一卷。

通州使院寄懷曉園大參。

判袂經旬久。新愁白髮生。汎舟同北役。驅馬獨南征。落日高陽里。秋風通潞城。相思不相見。孤館欲三更。

曹文運

字萬育。號蘇橋。一號蔚菴。通州諸生。著蘇橋詩彙一卷。

憶壯悔游太湖

青山兩點落平湖。仙履迷茫水上鳧。力士彎弓射犀兕。美人飛劍斷鶉鴝。玉簫金管風飄忽。綠酒紅燈浦有無。遙望夫君不可即。三閭搔首獨踟蹰。

幕中答沈確士先生見贈。

康熙癸巳。胡宗師招集李翰熙。金門詔。王荃。顧光世。朱奕恂。曹世治。沈德潛。入文運八人。赴幕。同校萬壽作人詩卷。

不將裘馬競翩翩。海內論交信有緣。才子八人叨末座。先生一騎許隨鞭。蓮花幕對南州榻。鸚鵡盃酣北海筵。因就澄江見詩士。那堪雲樹隔他年。

秦淮覽古

九華燈影烟初合。百轉簫聲日已斜。玉樹可憐搖落盡。更無人唱後庭花。

遊吳氏山林

山空人不見。隱隱白雲垂。亂竹誰分徑。疎花自記時。風來波動壁。客去鳥翻基。物外聯幽賞。摩看石上詩。

曹德岐 字楚文。號姬山。通州諸生。有詩名。著四崖詩艸。

金陵懷古

金陵千古帝王家。空惹行人感物華。桃葉渡頭浮薤葉。雨花臺上落松花。微微帶雨鶯歌澀。故故翻風燕影斜。鐘落景陽春已暮。更誰妝粉鬪殘霞。

曹一蕭 字寧一。號兩何。一號釣舫主人。通州人。以明經授徒于家。性情學問。山陽周白民。極稱服之。沒于乾隆辛卯六月。著望雪堂詩藁一卷。子星谷。字竹人。年已六十六矣。聞余徵詩。錄其先人自于野至兩何詩百首。

為曹氏一家言見寄。復題以七言律四首。附錄于此。不惜詩中有斷魂。百年愁思海雲昏。新聲亂索蛾眉笑。老宿曾銜蠹簡冤。匠石功名推柱石。雷門鎖鑰在龍門。靜聽寒谷人吹律。草被春風朽亦蕃。碧海新傳鐵網開。珊瑚有幸上蘭臺。南山撥霧搜全豹。東閣憐春掃落梅。士恨吳中身未死。人驚地下夢初回。校讎豈為傷流輩。振緒端應尙別裁。此日開眸因相馬。前年聾耳為聽蛙。竝教夢雨愁雲客。重問雕龍繡虎家。門戶不殊唐舊草。星河同上漢仙槎。何期沒世無稱後。華表猶蒙一字加。白骨黃墟何第等。紅氍青簡賴平章。芟除惡艸根原薄。陶鑄良金義最長。才鬼於中多起色。曠壇此外半荒唐。重將玉尺量修短。喜極翻令淚滿裳。

見梅

白髮春不管。東風又今年。徘徊野水曲。忽到梅花前。香淡一林月。影斜半笠烟。孤韻卻似我。相對心翛然。

上竹西水亭

陰陰連水竹。曲曲過桑麻。亂石穿雲起。長橋出屋斜。萍開魚唼葉。樹動鳥銜花。不解亭西路。誰人問酒家。